

1874 թուի յունվարի 19-ին Բարձրագոյն հաստատուած կանոններ, որոնք նախապէս հաւանութիւն են գտել Մեծ Իշխան կովկասեան Փոխարքայի կողմից

1) Համաձայն օրէնքների ժողովածուի XI հատորի, I մասի, 975-դ. յօդուածի, հայ-լուսաւորչական հոգեւորականութեան պարտաւորութիւնն է մնում հիմնել և կառավարել եկեղեցական դպրոցներ, նոյնպէս և հոգալ մտցնելու դաստաւութեան կանոնաւոր և յարմար եղանակ և պահպանել բարի վարք ուսուցանողների և աշակերտների մէջ:

2) Ժողովրդական դպրոցների տեսուչների (инспекторъ) վրայ, հայ հոգեւորականութեան հիմնելիք և վարելիք ընդհանուր կրթական եկեղեցական-ծխական դպրոցների վերաբերմամբ, պարտաւորութիւն է դրուում, համաձայն 1873 թուի նոյեմբերի 22-ին Բարձրագոյն հաստատուած Պետական Խորհրդի կարծիքին՝ հսկողութիւն ունենալ, 1) որ բոլոր դպրոցներում աւանդուի ռուսաց լեզուն, իսկ այն դպրոցներում, որտեղ աւանդում են ընդհանուր պատմութիւն և աշխարհագրութիւն, աւանդեն նաև ռուսաց պատմութիւն և աշխարհագրութիւն՝ ռուսերէն լեզուով:

2) Որ այս դպրոցներում ուսուցանողները լինեն ռուսահայատակներ և ունենան պարտ ու պատշաճ բարոյական յատկութիւններ: Իսկ միջամտել տնտեսական մասի մէջ կամ նրան կօնտրօլի ենթարկել՝ տեսուչներին իրաւունք չէ տրուում:

3) Այն ուսումնարանները, որոնք նպատակ ունին հոգեւորականներ պատրաստել՝ չեն ենթարկուում ժողովրդական ուսումնարանների տեսուչների հսկողութեան և գտնուում են հոգեւոր իշխանութեան բացառական վարչութեան տակ: Այս դպրոցների ուսման դասընթացի և ներքին կարգերի մասին կանոնները պէտք է ներկայացուեն Բարձրագոյն կառավարութեան ի հաստատութիւն: (յօդ. 1004)